

## બૃહત્સંગ્રહણી

નમિઉં અરિહંતાઇ, ઠિઇભવણો ગાહણા ય પત્તેયં;  
 સુરનારયાણ વુચ્છં, નરતિરિયાણં વિણા ભવણં. ૧  
 ઉવવાય-ચવણ-વિરહં, સંખં ઇગ સમઇયં ગમાગમણો;  
 દસ વાસસહસ્સાઇં, ભવણવઇણં જહન ઠિઇ. ૨  
 ચમર બલિ સારમહિઅં, તદેવીણં તુ તિન્નિ ચત્તારિ;  
 પલિયાઇં સહાઇં, સેસાણં નવનિકાયાણં. ૩  
 દાહિણ દિવડ્ઢપલિયં, ઉત્તરઓ હુન્તિ દુન્નિ દેસૂણા;  
 તદેવીમદ્ધપલિયં દેસૂણં આઉમુક્કોસં. ૪  
 વંતરિયાણ જહનં, દસવાસસહસ્સ પલિયમુક્કોસં;  
 દેવીણં પલિયદ્ધં, પલિયં અહિયં સસિરવીણં. ૫  
 લકખેણ સહસ્સેણ ય, વાસાણ ગહાણ પલિય મેએસિ;  
 ઠિઇ અદ્ધં દેવીણં, કમેણ નકખત તારાણં. ૬  
 પલિયદ્ધં ચઉભાગો, ચઉઅડભાગાહિગા ઉ દેવીણં;  
 ચઉજુઅલે ચઉભાગો, જહનમડભાગ પંચમએ. ૭  
 દો સાહિ સત્ત સાહિય, દસ ચઉદસ સત્તર અચર જા સુક્કો;  
 ઇક્કિક્ક મહિય મિત્તો, જા ઇગતીસુવરિ ગેવિજ્જે. ૮  
 તિત્તીસણુતરેસુ, સોહમ્માઇસુ ઇમા ઠિઇ જિટ્ઠા;  
 સોહમ્મે ઈસાણો, જહન ઠિઇ પલિયમહિયં ય. ૯  
 દો સાહિ સત્ત દસ ચઉદસ, સત્તર અચરાઇંજા સહસ્સારો;  
 તપ્પરઓ ઇક્કિક્કં, અહિયં જાણુત્તરચઉક્કે. ૧૦  
 ઇગતીસ સાગરાઇં, સવ્વટ્ઠે પુણ જહનઠિઇ નત્થિ;  
 પરિગ્ગહિયાણિયરાણિ ય, સોહમ્મીસાણ દેવીણં. ૧૧  
 પલિયં અહિયં ય કમા, ઠિઇ જહન ઇઓ ય ઉક્કોસા;  
 પલિયાઇં સત્ત પન્નાસ, તહ ય નવ પંચવન્ના ય. ૧૨  
 પણ ઇ ચઉ ચઉ અટ્ઠ ય, કમેણ પત્તેયમગ્ગમહિસીઓ;  
 અસુર નાગાઇ વંતર, જોઇસ-કપ્પ દુગ્ગિદાણં. ૧૩  
 દુસુ તેરસ દુસુ બારસ, ઇ પણ ચઉ ચઉ દુગે દુગે ય ચઉ;  
 ગેવિજ્જણુતરે દસ, બિસટ્ઠિં પચરા ઉવરિ લોએ. ૧૪  
 સોહમુક્કોસ ઠિઇ, નિયપચર વિહત્ત ઇચ્છ સંગુણિઓ;  
 પચરુક્કોસ ઠિઇઓ, સવ્વત્થ જહનઓ પલિયં. ૧૫  
 સુરકપ્પઠિઇવિસેસો, સગપચરવિહત્ત ઇચ્છ સંગુણિઓ;  
 હિઠિલ્લઠિઇસહિઓ, ઇચ્છિય પચરંમિ ઉક્કોસા. ૧૬  
 કપ્પસ્સ અંતપચરે, નિયકપ્પ-વડિંસયા વિમાણાઓ;  
 ઇંદ નિવાસા તેસિં, ચઉદિસિ લોગપાલાણં. ૧૭  
 સોમજમાણં સત્તિભાગ-પલિય વરૂણસ્સ દુન્નિ દેસૂણા;  
 વેસમણે દો પલિયા, એસા ઠિઇલોગપાલાણં. ૧૮  
 અસુરા નાગ સુવન્ના, વિજ્જુ અગ્ગી ય દીવ ઉદહી અ;  
 દિસિ પવણ થણિય દસવિહ, ભવણવઇ તેસુ દુદુ ઇંદા.  
 ચમરે બલી અ ધરણો, ભૂયાણંદે ય વેણુદેવે ય;  
 તત્તો ય વેણુદાલી, હરિકંતે હરિસ્સહે ચેવ. ૨૦  
 અગ્ગિસિહ અગ્ગિમાણવ, પુન્ન વિસિટ્ઠે તહેવ જલકંતે;

જલપહ તહ અમિઅગઈ, મિયવાહણ દાહિણુત્તરઓ.  
 વેલંબે ય પભંજણ, ઘોસ મહાઘોસ એસિમન્નયરો;  
 જંબુદ્દીવં છત્તં, મેરું દંડં પહુ કાઉં. ૨૨  
 ચઉત્તીસા ચઉચત્તા, અટ્ઠતીસા ય ચત્ત પંચણ્ઠં;  
 પન્ના ચત્તા કમસો, લક્ખા ભવણાણ દાહિણઓ. ૨૩  
 ચઉ ચઉ લક્ખ વિહૂણા, તાવઘયા ચેવ ઉત્તર દ્વિસાએ;  
 સવ્વેવિ સત્તકોડી, બાવત્તરી હુન્તિ લક્ખા ય. ૨૪  
 રચણાએ હિટ્ઠવરિં, જોયણ સહસ્સં વિમુત્તું તે ભવણા;  
 જંબુદ્દીવ સમા તહ, સંખમસંખિજ્જવિત્થારા. ૨૫  
 ચુડામણિ ફણિ ગરુડે, વજ્જે તહ કલસ સીહ અસ્સે ય;  
 ગય મયર વદ્ધમાણે, અસુરાઇણં મુણસુ ચિંધે. ૨૬  
 અસુરા કાલા નાગુ-દહિ, પંડુરા તહ સુવન્ન દ્વિસિ થણિયા;  
 કણગાભ વિજ્જુ સિહિ દીવ, અરુણા વાગિ પિયંગુ નિભા. ૨૭  
 અસુરાણ વત્થ રત્તા, નાગોદહિ-વિજ્જુ દીવ સિહિ નીલા;  
 દ્વિસિ થણિય સુવન્નાણં, ધવલા વાઉણ સંઝરુઈ. ૨૮  
 ચઉ-સટ્ઠિં સટ્ઠિં અસુરે, છચ્ચ સહસ્સાઈ ધરણમાઇણં;  
 સામાણિયા ઇમેસિં, ચઉગ્ગુણા આયરક્ખા ય. ૨૯  
 રચણાએ પઢમ જોયણ-સહસ્સે હિટ્ઠવરિં સય સય વિહૂણે;  
 વંતરિયાણં રમ્મા, ભોમા નયરા અસંખિજ્જા. ૩૦  
 બાહિં વટ્ટા અંતો-ચઉરંસા અહો ય કણિઆયારા;  
 ભવણવઈણં તહ વંતરાણ, ઇંદ ભવણાઓ નાયવ્વા. ૩૧  
 તહિં દેવા વંતરિયા, વરતરુણીગીયવાઇયરવેણં;  
 નિચ્ચં સુહિયા પમુઇયા, ગયં પિ કાલં ન યાણંતિ. ૩૨  
 તે જંબુદ્દીવ ભારહ, વિદેહ સમ ગુરુ જહન્ન મજ્જિમગા;  
 વંતર પુણ અટ્ઠવિહા, પિસાય ભૂયા તહા જક્ખા. ૩૩  
 રક્ખસ કિંનર કિંપુરિસા, મહોરગા અટ્ઠમા ય ગંધવ્વા;  
 દાહિણુત્તર ભેયા, સોલસ તેસિં ઇમે ઇંદા. ૩૪  
 કાલે ય મહાકાલે, સુરુવ પડિરુવ પુન્નભદ્દે ય;  
 તહ ચેવ માણિભદ્દે ભીમે, ય તહા મહાભીમે. ૩૫  
 કિંનર કિંપુરિસે સપ્પુરિસા, મહાપુરિસ તહય અઇકાયે;  
 મહાકાય ગીયરઈ, ગીયજસે દુન્નિ દુન્નિ કમા. ૩૬  
 ચિંધં કલંબ સુલસે, વડ ખટ્ટંગે અસોગ ચંપયએ;  
 નાગે તુંબરુ અ ઝએ, ખટ્ટંગવિવજ્જિયા રુક્ખા. ૩૭  
 જક્ખ પિસાય મહોરગ, ગંધવ્વા સામ કિંનરા નીલા;  
 રક્ખસ કિંપુરુસા વિય, ધવલા ભૂયા પુણો કાલા. ૩૮  
 અણપત્તી, પણપત્તી, ઇસિવાઈ ભૂયવાઇએ ચેવ;  
 કંદીય મહાકંદી, કોહંડે ચેવ પયંગે ય. ૩૯  
 ઇય પઢમજોયણસએ, રચણાએ અટ્ઠ વંતરા અવરે;  
 તેસુ ઇહ સોલસિંદા, રુચગઅહો દાહિણુત્તરઓ. ૪૦  
 સંનિહિએ સામાણે, ઘાઇ વિહાએ ઇસીય ઇસીવાલે;  
 ઇસર મહેસરે વિ ય હવઇ સુવત્થે વિસાલે ય. ૪૧  
 હાસે હાસરઇ વિ ય, સેએ ય ભવે તહા મહાસેએ;  
 પયંગે પયંગવઈ વિ ય સોલસ ઇંદાણ નામાઈ. ૪૨

સામાણિયાણ ચઉરો, સહસ્સ સોલસ ય આયરકખાણં;  
પત્તેયં સવ્વેસિ, વંતરવઇ સસિરવીણં ય. ૪૩

ઇંદ સમ તાયતીસા, પરિસતિયા રકખ લોગપાલા ય;  
અણિય પઇત્તા અભિઓગા; કિબ્બિસં દસ ભવણ વેમાણી.

૪૪

ગંધવ્વ નટ્ટે હય ગય, રહ ભડ અણિયાણિ સવ્વઇંદાણં;  
વેમાણિયાણ વસહા, મહિસા ય અહોનિવાસીણં. ૪૫

તિત્તીસ તાયતીસા, પરિસતિયા લોગપાલ ચત્તારિ;  
અણિઆણિ સત્ત સત્તય, અણિયાહિવ સવ્વઇંદાણં. ૪૬

નવરં વંતરજોઇસ-ઇંદાણ ન હુન્તિ લોગપાલાઓ;  
તાયત્તીસભિહાણા, તિયસા વિ ય તેસિં ન હુ હુન્તિ. ૪૭

સમભૂતલાઓ અટ્ટઠહિં, દસૂણ જોયણસએહિં આરબ્ભ;  
ઉવરિ દસુત્તર જોયણ, સયંમિ ચિટ્ટઠન્તિ જોઇસિયા. ૪૮

તત્થ રવી દસજોયણ, અસીઇ તદ્દુવરિંસસી ય રિકખેસુ;  
અહ ભરણિ સાઇ ઉવરિં, બહિં મૂલો ભિતરે અભિઇ.

૪૯

તાર રવી ચંદ રિકખા, બુહ સુક્કા જીવ મંગલ સણિયા;  
સગ સય નઉય દસ અસિઇ, ચઉ ચઉ કમસો તિયા ચઉસુ.

૫૦

ઇક્કારસ જોયણ સય, ઇગવીસિક્કાર સાહિયા કમસો;  
મેરુ અલોગાબાહં, જોઇસ ચક્કં ચરઇ ઠાઇ. ૫૧

અદ્ધ કવિટ્ટાગારા, ફલિહમયા રમ્મ જોઇસવિમાણા;  
વંતરનયરેહિંતો, સંખિજજગુણા ઇમે હુન્તિ. ૫૨

તાઇં વિમાણાઇં પુણ, સવ્વાઇં હુન્તિ ફાલિહમયાઇં;  
દગફાલિહ મયા પુણ, લવણે જે જોઇસવિમાણા. ૫૩

જોયણિગસટ્ટિઠ ભાગા, ઇપ્પન્ન અડયાલ ગાઉ દુ ઇગ ઢં;  
ચંદાઇવિમાણાયામ-વિત્થડા અદ્ધમુચ્ચતં. ૫૪

પણયાલ લકખ જોયણ, નરખિત્તં તત્થિમે સયા ભમિરા;  
નરખિત્તાઉ બહિં પુણ, અદ્ધપમાણા ઠિઆ નિચ્ચં. ૫૫

સસિ રવિ ગહ નકખત્તા, તારાઓ હુન્તિ જહુત્તરં સિગ્ઘા;  
વિવરીયા ઉ મહડ્ડિઠેઅ, વિમાણવહગા કમેણેસિં. ૫૬

સોલસ સોલસ અડ ચઉ, દો સુર સહસ્સા પુરઓ દાહિણઓ;  
પચ્છિમ ઉત્તર સીહા, હત્થી વસહા હયા કમસો. ૫૭

ગહ અટ્ટઠાસી નકખત્ત, અડવીસં તાર કોડિકોડીણં;  
છાસટ્ટિઠ સહસ્સ નવસય, પણહત્તરિ એગસસિસિન્નં. ૫૮

કોડા કોડી સન્નં-તરં તુ મન્નન્તિ ખિત્તથોવતયા;  
કેઇ અન્ને ઉસ્સે-હંગુલમાણેણ તારાણં. ૫૯

કિણહં રાહુ વિમાણં, નિચ્ચં ચંદેણ હોઇ અવિરહિયં;  
ચઉરંગુલમપ્પત્તં હિટ્ટઠા ચંદસ્સ તં ચરઇ. ૬૦

તારસ્સ ય તારસ્સ ય, જંબુદીવંમિ અંતરં ગુરુયં;  
બારસજોયણસહસ્સા, દુન્નિસયા ચેવ બાયાલા. ૬૧

નિસદ્ધો ય નીલવંતો, ચત્તારિસય ઉચ્ચ પંચસય કૂડા;  
અદ્ધ ઉવરિં રિકખા, ચરંતિ ઉભયટ્ટઠ બાહાએ. ૬૨

છાવટ્ટઠા દુન્નિ સયા, જહન્નમેયં તુ હોઇ વાઘાએ;  
નિવ્વાઘાએ ગુરુલહુ, દો ગાઉ ય ધનુસયા પંચ. ૬૩

માણુસ નગાઓ બાહિં, ચંદા સૂરસ્સ સૂર ચંદસ્સ;

જોયણ સહસ્સ પન્નાસ, ણૂણગા અંતરં દિટ્ઠં. ૬૪  
 સસિ સસિ રવિ રવિ સાહિય, જોયણ લક્ખેણ અંતરં હોઇ;  
 રવિ અંતરિયા સસિણો, સસિ અંતરિયા રવિ દિત્તા.૬૫  
 બહિયા ઉ માણુસુત્તરઓ, ચંદા સૂરા અવટ્ઠિઠ ઉજ્જોયા;  
 ચંદા અભિઠ જુત્તા, સૂરા પુણ હુન્તિ પુસ્સેહિં. ૬૬  
 ઉદ્ધારસાગર દુગે, સડ્ઢે સમએહિં તુલ્લદીવુદ્દહી;  
 દુગુણા દુગુણા પવિત્થર-વલયાગારા પઢમવજ્જં. ૬૭  
 પઢમો જોયણ લક્ખં, વટ્ટો તં વેટ્ઠિઉ ઠિઆ સેસા;  
 પઢમો જંબુદીવો, સયંભૂરમણોદ્દહી ચરમો. ૬૮  
 જંબૂ ધાયઈ પુક્ખર, વારુણીવર ખીર ઘય ખોય નંદીસરા;  
 અરુણ રુણુવાય કુંડલ, સંખ રૂયગ ભુયગ કુસ કુંચા.૬૯  
 પઢમે લવણો જલહી, બીએ કાલોય પુક્ખરાઈસુ;  
 દીવેસુ હુન્તિ જલહી, દીવસમાણેહિં નામેહિં. ૭૦  
 આભરણ વત્થ ગંધે, ઉપ્પલ તિલએ ય પઉમનિહિ રયણે;  
 વાસહર દહ નઈઓ, વિજયા વક્ખાર કપ્પિંદા. ૭૧  
 કુરુ મંદર આવાસા, કૂડા નક્ખત્ત ચંદ સૂરા ય;  
 અન્નેવિ એવમાઈ, પસત્થવત્થૂણ જે નામા. ૭૨  
 તન્નામા દીવુદ્દહી, તિપડોયાયારા હુન્તિ અરુણાઈ;  
 જંબૂલવણાઈયા, પત્તેયં તે અસંખિજ્જા. ૭૩  
 તાણંતિમ સૂરવરાવભાસજલહી પરંતુ ઈક્કિક્કા;  
 દેવે નાગે જક્ખે, ભૂએ ય સયંભૂરમણે ય. ૭૪  
 વારુણીવર ખીરવરો, ઘયવર લવણો ય હુન્તિ ભિન્નરસા;  
 કાલોય પુક્ખરોદ્દહિ, સયંભૂરમણો ય ઉદ્દગરસા. ૭૫  
 ઈક્ખુરસ સેસજલહી, લવણે કાલોએ ચરિમિ બહુમચ્છા;  
 પણ સગ દસ જોયણ સય, તણુ કમા થોવ સેસેસુ.૭૬  
 દો સસિ દો રવિ પઢમે, દુગુણા લવણંમિ ધાયઈ સંડે;  
 બારસ સસિ બારસ રવિ, તપ્પભિઠ નિદ્દિટ્ઠ સસિ-રવિણો. ૭૭  
 તિગુણા પુવ્વિલજુયા, અણંતરાણંતરંમિ ખિત્તંમિ;  
 કાલોએ બાયાલા, ભિસત્તરી પુક્ખરદ્ધંમિ. ૭૮  
 દો સસિ દો રવિપંતિ, એગંતરિયા ઇસટ્ઠિસંખાયા;  
 મેરું પયાહિણંતા, માણુસખિત્તે પરિઅડન્તિ. ૭૯  
 એવં ગહાઈણો વિ હુ, નવરં ધુવપાસવત્તિણો તારા;  
 તં ચિય પયાહિણંતા, તત્થેવ સયા પરિભમન્તિ. ૮૦  
 પન્નરસ ચુલસીઈસયં, ઈહ સસિરવિમંડલાઈં તક્ખિત્તં;  
 જોયણ પણસય દસહિય, ભાગા અડયાલ ઈગસટ્ઠા. ૮૧  
 તીસિ ગસટ્ઠા ચઉરો, ઈગ ઈગસટ્ઠસ્સ સત્ત ભઈયસ્સ;  
 પણાતીસં ય દુજોયણ, સસિરવિણો મંડલંતરયં. ૮૨  
 મંડલદ્દસગં લવણે, પણાગં નિસઢંમિ હોઇ ચંદસ્સ;  
 મંડલઅંતરમાણં, જાણપમાણં પુર કહિયં. ૮૩  
 પણસટ્ઠી નિસઢંમિય દુન્નિયબાહા દુજોયણંતરિયા;  
 ઈગુણવીસં તુ સયં, સૂરસ્સ ય મંડલા લવણે. ૮૪  
 સસિ રવિણો લવણંમિ ય, જોયણસયતિન્નિ તીસઅહિયાઈં;  
 અસીયં તુ જોયણસયં, જંબુદીવંમિ પવિસન્તિ. ૮૫

૭૭

૮૧

ગહરિકખતારસંખં, જત્યેચ્છસિ નાઉ મુદ્દહિ દીવે વા;  
 તસ્સસિહિ એગસસિણો, ગુણસંખં હોઇ સવ્વગ્ગં. ૮૬  
 બત્તીસટ્ઠાવીસા બારસ અડ ચઉ વિમાણ લકખાઇં;  
 પન્નાસ ચત્ત છ સહસ્સ, કમેણ સોહમ્માઇસુ. ૮૭  
 દુસુ સયચઉ દુસુ સય તિગ, મિગારસહિયં સયં તિગેહિટ્ઠા;  
 મજ્જે સત્તુત્તરસય, મુવરિતિગે સયમુવરિ પંચ. ૮૮  
 ચુલસીઇ લકખ સત્તાણવઇ-સહસ્સા વિમાણ તેવીસં;  
 સવ્વગ્ગ મુડ્ઢ લોગંમિ, ઇંદયા બિસટ્ઠિઠ પયરેસુ. ૮૯  
 ચઉદ્દિસિ ચઉ પંતીઓ, બાસટ્ઠિઠ વિમાણિયા પઢમપયરે;  
 ઉવરિ ઇક્કિક્કહીણા, અણુત્તરે જાવ ઇક્કિક્કં. ૯૦  
 ઇંદય વટ્ટા પંતીસુ, તો કમસો તંસ ચઉરંસા વટ્ટા;  
 વિવિહા પુષ્કવકિન્ના, તયંતરે મુત્તું પુવ્વદિસિ. ૯૧  
 એગં દેવેદીવે, દુવે ય નાગોદ્દહીસુ બોદ્ધવ્વે;  
 ચત્તારિ જકખદીવે, ભૂયસમુદ્દેસુ અટ્ઠેવ. ૯૨  
 સોલસ સયંભૂરમણે, દીવેસુ પઇટ્ઠિયા ય સુરભવણા;  
 ઇગતીસં ય વિમાણા, સયંભૂરમણે સમુદ્દે ય. ૯૩  
 વટ્ટં વટ્ટેસુવરિં તંસં તંસસ્સ ઉવરિમં હોઇ;  
 ચઉરંસે ચઉરંસં ઉડ્ઢંતુ વિમાણસેદીઓ. ૯૪  
 સવ્વે વટ્ટવિમાણા, એગદુવારા હવન્તિ નાયવ્વા;  
 તિન્નિ ય તંસવિમાણે, ચત્તારિ ય હુન્તિ ચઉરંસે. ૯૫  
 પાગારપરિક્ખિત્તા, વટ્ટવિમાણા હવન્તિ સવ્વેવિ;  
 ચઉરંસ વિમાણાણં, ચઉદ્દિસિં વેઇયા હોઈ. ૯૬  
 જત્તો વટ્ટ વિમાણા, તત્તો તંસસ્સ વેઇયા હોઈ;  
 પાગારો બોધવ્વો, અવસેસેસું તુ પાસેસુ. ૯૭  
 આવલિયવિમાણાણં, અંતરં નિયમસો અસંખિજ્જં;  
 સંખિજ્જમસંખિજ્જં, ભણિયં પુષ્કવકિન્નાણં. ૯૮  
 અચ્ચંતસુરહિગંધા, ફાસે નવણીયમઉયસુહફાસા;  
 નિચ્ચુજ્જોયા રમ્મા, સયંપહા તે વિરાયંતિ. ૯૯  
 જે દક્ખિણેણા ઇંદા, દાહિણાઓ આવલી મુણેયવ્વા;  
 જે પુણ ઉત્તર ઇંદા, ઉત્તરઓ આવલી મુણે તેસિં. ૧૦૦  
 પુવ્વેણ પચ્છિમેણ ય, સામન્ના આવલી મુણેયવ્વા;  
 જે પુણ વટ્ટ વિમાણા, મજ્જેલ્લા દાહિણિલ્લાણં. ૧૦૧  
 પુવ્વેણ પચ્છિમેણ ય, જે વટ્ટા તે વિ દાહિણિલ્લસ્સ;  
 તંસ ચઉરંસગા પુણ, સામન્ના હુન્તિ દુણં પિ. ૧૦૨  
 પઢમંતિમપયરાવલિ, વિમાણમુહભૂમિ તસ્સમાસદ્ધં;  
 પયરગુણમિટ્ઠ કપ્પે, સવ્વગં પુષ્કકિન્નિયરે. ૧૦૩  
 ઇગદ્દિસિપંતિવિમાણા, તિવિભત્તા તંસ ચઉરંસા વટ્ટા;  
 તંસેસુ સેસમેગં ખિવ સેસ દુગસ્સ ઇક્કિક્કં. ૧૦૪  
 તંસેસુ ચઉરંસેસુ ય, તો રાસિતિગંપિ ચઉગુણં કાઉં;  
 વટ્ટેસુ ઇંદયં ખિવ, પયરઘણં મીલિયં કપ્પે. ૧૦૫  
 સત્તસય સત્તવીસા, ચત્તારિસયા ય હુન્તિ ચઉનઉયા  
 ચત્તારિ ય ઇસાણો, સોહમ્મે હુન્તિ વટ્ટાઇ. ૧૦૬  
 એમેવ ય ઇસાણો, નવરં વટ્ટાણ હોઇ નાણત્તં;

દો સય અટ્ઠતીસા, સેસા જહ ચેવ સોહમ્મે. ૧૦૭  
 પુવ્વાવરા છલંસા તંસા પુણ દાહિણુત્તરા બજ્જઃ;  
 અભિન્નતર ચઉરંસા, સવ્વા વિ ય કણ્ઠરાઈઓ. ૧૦૮  
 ચુલસી અસિઈ બાવત્તરિ, સત્તરિ સટ્ઠી ય પન્ન ચત્તાલા;  
 તુલ્લસુર તીસ વીસા, દસસહસ્સ આયરકખ ચઉગુણિયા.  
 કખ્પેસુ ય મિય મહિસો, વરાહ સીહા ય છગલ સાલૂરા;  
 હય ગય ભુયંગ ખગ્ગી, વસહા વિડિમાઇં ચિંધાઇં. ૧૧૦  
 દુસુ તિસુ તિસુ કખ્પેસુ, ઘણુદહિ ઘણાવાય તદ્દુભયં ચ કામા;  
 સુરભવણપઇટ્ઠાણં, આગાસપઇટ્ઠિયા ઉવરિં. ૧૧૧  
 સત્તાવીસસયાઇં, પુઢવિપિંડો વિમાણઉચ્ચત્તં;  
 પંચસયા કખ્પદુગે, પઢમે તત્તો ય ઈક્કિક્કં. ૧૧૨  
 હાયઇ પુઢવીસુ સયં, વડ્ઢઇ ભવણેસુ દુ દુ દુ કખ્પેસુ;  
 ચઉગે નવગે પણગે, તહેવ જાણુત્તરેસુ ભવે. ૧૧૩  
 ઇગવીસ સયા પુઢવી, વિમાણમિક્કારસેવ ય સયાઇં;  
 બત્તીસ જોયણ સયા, મિલિયા સવ્વત્થ નાયવ્વા. ૧૧૪  
 પણ ચઉ તિ દુ વન્નવિમાણ, સધય દુસુ દુસુ ય જા સહસ્સારો;  
 ઉવરિ સિય ભવણવંતર-જોઇસિયાણં વિવિહવન્ના. ૧૧૫  
 રવિણો ઉદ્દયત્થંતર, ચઉનવઇ સહસ્સ પણસય છવીસા;  
 બાયાલ સટ્ઠિઠ ભાગા, કક્કડસંકંતિ દ્વિયહંમિ. ૧૧૬  
 એયંમિ પુણો ગુણિએ, તિ પંચ સગ નવહિં હોઇ કમમાણં;  
 તિગુણંમિ ય દોલકખા, તેસીઇ સહસ્સ પંચસયા. ૧૧૭  
 અસીઇ છસટ્ઠિઠ ભાગા, જોયણ ચઉલકખ બિસત્તરિસહસ્સા;  
 છચ્ચ સયા તેતીસા, તીસકલા પંચ ગુણિયંમિ. ૧૧૮  
 સત્તગુણે છલકખા, ઇગસટ્ઠિઠ સહસ્સ છસય છાસીયા;  
 ચઉપન્નકલા તહ નવ-ગુણંમિ અડલકખ સડ્ઢાઓ. ૧૧૯  
 સત્તસયા ચત્તાલા, અટ્ઠારસકલા ય ઇય કમા ચઉરો;  
 ચંડા ચવલા જયણા, વેગા ય તહા ગઈ ચઉરો. ૧૨૦  
 ઇત્થ ય ગઇં ચઉત્થિં જયણયરિં નામ કેઇ મન્નંતિ;  
 એહિં કમેહિં મિમાહિ ગઇહિં ચઉરો સુરા કમસો. ૧૨૧  
 વિકખંભં આયામં, પરિહિં અભિન્નતરં ચ બાહિરિયં;  
 જુગવં મિણંતિ છમ્માસ, જાવ ન તહાવિ તે પારં. ૧૨૨  
 પાવંતિ વિમાણાણં, કેસિં પિહુ અહવ તિગુણયાઇએ;  
 કમ ચઉગે પત્તેયં, ચંડાઇ ગઈ ઉ જોઇજ્જા. ૧૨૩  
 તિગુણે કખ્પચઉગે, પંચગુણોણં તુ અટ્ઠસુ મુણિજ્જા;  
 ગેવિજ્જે સત્તગુણોણં, નવગુણોણુત્તરચઉક્કે. ૧૨૪  
 પઢમપયરંમિ પઢમે-કખ્પે ઉડુનામ ઇંદયવિમાણં;  
 પણયાલલકખજોયણ, લકખં સવ્વુવરિસવ્વટ્ઠં. ૧૨૫  
 ઉડુ ચંદ રયય વગ્ગુ, વીરિયે વરુણે તહેવ આણંદે;  
 બંભે કંચણ રુઇરે, ચંદ અરુણે ય વરુણે ય. ૧૨૬  
 વેરૂલિય રયગ રુઇરે, અંકે ફલિહે તહેવ તવણિજ્જે;  
 મેહે અઘ હલિદે, નલિણે તહ લોહિયકખે ય. ૧૨૭  
 વઇરે અંજણ વરમાલ, રિટ્ઠ દેવે ય સોમ મંગલએ;  
 બલભદ્રે ચક્ક ગયા, સોવત્થિય ણંદિયાવત્તે. ૧૨૮

આભંકરે ય ગિદ્ધી, કેઊ ગરુલે ય હોઇ બોધવ્વે;  
 બંભે બંભહિએ પુણ, બંભુત્તર લંતએ ચેવ. ૧૨૯  
 મહસુક્ક સહસ્સારે, આણય તહ પાણએ ય બોધવ્વે;  
 પુષ્કે લંકાર આરણ, તહા વિય અચ્ચુએ ચેવ. ૧૩૦  
 સુદંસણ સુપરિબદ્ધે, મણોરમે ચેવ હોઇ પઢમ તિગે;  
 તત્તો ય સવ્વભદ્ધે, વિસાલએ સુમણે ચેવ. ૧૩૧  
 સોમણસે પીઇકરે, આઇચ્ચે ચેવ હોઇ તઇય તિગે;  
 સવ્વટ્ઠસિદ્ધિ નામે, ઇંદયા એવ બાસટ્ઠી. ૧૩૨  
 પણયાલીસં લક્ખા, સીમંતય માણુસં ઉડુ સિવં ય;  
 અપયટ્ઠાણો સવ્વટ્ઠ જંબૂદ્દીવો ઇમં લક્ખં. ૧૩૩  
 અહ ભાગા સગ પુઢવીસુ, રજજુ ઇક્કિક્ક તહેવ સોહમ્મે;  
 માહિંદ લંત સહસ્સાર, અચ્ચુઅ ગેવિજજ લોગંતે. ૧૩૪  
 સમ્મત્ત ચરણ સહિયા, સવ્વં લોગં કુસે નિરવસેસં;  
 સત્ત ય ચઉદ્દસ ભાએ, પંચ ય સુય દેસવિરઇએ. ૧૩૫  
 ભવણ વણ જોઇ સોહમ્મી સાણે સત્તહત્થતણુમાણં;  
 દુ દુ દુ ચઉક્કે ગેવિજજણુત્તરે હાણિઇક્કિક્કં. ૧૩૬  
 કપ્પ દુગ દુ દુ દુ ચઉગે, નવગે પણગે ય જિટ્ઠ ઠિઇ અયરા;  
 દો સત્ત ચઉદ્દ ટ્ઠારસ, બાવીસિગતીસ તિત્તીસા. ૧૩૭  
 વિવરે નાણિક્કુણે, ઇક્કારસગા ઉ પારિએ સેસા;  
 હત્થિક્કારસભાગા, અયરે અયરે સમહિયંમિ. ૧૩૮  
 ચય પુવ્વસરીરાઓ, કમેણ ઇગુત્તરાઇ વુડ્ઢીએ;  
 એવં ઠિઇવિસેસા, સણંકુમારાઇતણુમાણં. ૧૩૯  
 ભવધારણિજજ એસા, ઉત્તરવેઉવ્વિ જોયણા લક્ખં;  
 ગેવિજજણુત્તરેસુઉત્તરવેઉવ્વિયાનત્થિ. ૧૪૦  
 સાહાવિયવેઉવ્વિય, તણુ જહન્ના કમેણ પારંભે;  
 અંગુલ-અસંખભાગો, અંગુલસંખિજજભાગો ય. ૧૪૧  
 સામન્નેણં ચઉવિહ-સુરેસુ બારસમુહુત્તઉક્કોસા;  
 ઉવવાયવિરહકાલો, અહ ભવણાઇસુ પત્તેયં. ૧૪૨  
 ભવણ વણ જોઇ સોહમ્મી-સાણેસુ મુહુત્ત ચઉવીસં;  
 તો નવદિશ વીસમુહુ, બારસદિશ દસમુહુત્તાય. ૧૪૩  
 બાવીસ સડ્ઢ દિયહા પણપાલ અસીઇ દિણ સયં તત્તો;  
 સંખિજજા દુસુમાસા, દુસુવાસા તિસુ તિગેસુ કમા. ૧૪૪  
 વાસાણ સયા સહસ્સા, લક્ખ તહ ચઉસુ વિજયમાઇસુ;  
 પલિયા અસંગભાગો, સવ્વટ્ઠે સંખભાગો ય. ૧૪૫  
 સવ્વેસિંપિ જહન્નો, સમઓ એમેવ ચવણ વિરહો વિ;  
 ઇગ દુતિસંખમસંખા, ઇગ સમએ હુન્તિ ય ચવંતિ. ૧૪૬  
 નર પંચિદિય તિરિયા ણુપ્પત્તી સુરભવે પજજતાણં;  
 અજ્જવસાય વિસેસા, તેસિં ગઇ તારતમ્મં તુ. ૧૪૭  
 નરતિરિ અસંખજીવી, સવ્વે નિયમેણ જંતિ દેવેસુ;  
 નિયઆઉય સમ-હીણા-ઉએસુ ઇસાણ અંતેસુ. ૧૪૮  
 જંતિ સમુચ્છિમતિરિયા ભવણવણેસુ ન જોઇમાઇસુ;  
 જં તેસિં ઉવવાઓ, પલિયાડ સંખંસ આઊસુ. ૧૪૯  
 બાલતવે પડિબદ્ધા, ઉક્કડરોસા તવેણ ગારવિયા;

વેરેણ ય પરિબદ્ધા, મરિઉં અસુરેસુ જાયંતિ. ૧૫૦  
 રજ્જુગહ વિસભક્રખણ-જલજલણપવેસ તણહ છુહદુહઓ;  
 ગિરિસિરપડણાઉ મુઆ, સુહભાવાહુંતિ વંતરિયા.૧૫૧  
 તાવસ જા-જોઇસિયા, ચરગપરિવ્વાય બંભલોગો જા;  
 જા સહસ્સારો પંચિદિ તિરિય જા અચ્ચુઓ સડ્ઢા.૧૫૨  
 જઇલિંગ મિચ્છદિદિટ્ઠ, ગેવિજ્જા જાવ જંતિ ઉક્કોસં;  
 પયમવિ અસદ્દહંતો, સુત્તત્થં મિચ્છદિદિટ્ઠઓ. ૧૫૩  
 સુત્તં ગણહરરઇયં, તહેવ પત્તેયબુદ્ધ રઇયં ચ;  
 સુયકેવલિણા રઇયં, અભિન્નદસપુલ્લિણા રઇયં. ૧૫૪  
 છઉમત્થસંજયાણં, ઉવવા ઉક્કોસઓ અ સવ્વટ્ઠે;  
 તેસિં સડ્ઢાણં પિ ય, જહનઓ હોઇ સોહમ્મે. ૧૫૫  
 લંતંમિ ચઉદપુલ્લિસ્સ તાવસાઇણ વંતરેસુ તહા;  
 એસો ઉવવાયવિહિ, નિયકિરિયઠિયાણ સવ્વોવિ.૧૫૬  
 વજ્જરિસહનારાયં, પઢમં બીયં ચ રિસહ નારાયં;  
 નારાય મદ્દનારાયં, કીલિયા તહ ય છેવટ્ઠં. ૧૫૭  
 એએ છ સંઘયણા, રિસહો પટ્ટો ય કીલિયા વજ્જં;  
 ઉભઓ મક્કડબંધો, નારાઓ હોઇ વિન્નેઓ. ૧૫૮  
 છ ગબ્ભતિરિનરાણં સમુચ્છિમપણિદિવિગલ છેવટ્ઠં;  
 સુરનેરઇયા એગિંદિયા ય સવ્વે અસંઘયણા. ૧૫૯  
 છેવટ્ઠેણં ઉ ગમ્મઇ, ચઉરો જા કપ્પ કીલિયાઇસુ;  
 ચઉસુ દુ દુ કપ્પ વુડ્ઢી, પઢમેણં જાવ સિદ્ધી વિ.૧૬૦  
 સમયઉરંસે નગ્ગોહ, સાઇ વામણ ય ખુજ્જ હુંડે ય;  
 જીવાણ ઇસંઠાણા, સવ્વત્થ સુલક્રખણં પઢમં. ૧૬૧  
 નાહીએ ઉવરિબીયં, તઇયમહો પિટ્ઠિઉયરઉર વજ્જં;  
 સિરગીવ પાણિ પાએ, સુલક્રખણં તં ચઉત્થં તુ.૧૬૨  
 વિવરીયં પંચમગં, સવ્વત્થ અલક્રખણં ભવે છટ્ઠં;  
 ગબ્ભયનરતિરિય છહા, સુરા સમા હુંડયા સેસા.૧૬૩  
 જંતિ સુરા સંખાઉ ય, ગબ્ભય પજ્જત્તમણુય તિરિએસુ;  
 પજ્જત્તેસુ ય બાયર-ભૂદ્દગ પત્તેયગવણેસુ. ૧૬૪  
 તત્થવિ સણંકુમાર-પભિઇ એગિંદિએસુ નો જંતિ;  
 આણય પમુહા ચવિઉં, મણુએસુ ચેવ ગચ્છન્તિ.૧૬૫  
 દો કપ્પ કાયસેવી, દો દો દો ફરિસડ્ઢવસદ્દેહિં;  
 ચઉરો મણેણુ વરિમા, અપ્પવિયારા અણંતસુહા.૧૬૬  
 જં ય કામસુહં લોએ, જં ય દિવ્વં મહાસુહં;  
 વીયરાયસુહસ્સ ય; ણંતભાગં પિ નગ્ગઇ. ૧૬૭  
 ઉવવાઓ દેવીણં, કપ્પ દુગં-જા પરઓ સહસ્સારા;  
 ગમણાગમણં નત્થિ, અચ્ચુય પરઓ સુરાણંપિ.૧૬૮  
 તિપલિય તિસાર તેરસ, સારા કપ્પ દુગ તઇયલંત અહો;  
 કિલ્લિસિય ન હુન્તિ ઉવરિં, અચ્ચુય પરઓ ભિઓગાઈ.  
 અપરિગ્ગહદેવીણં, વિમાણ લકખા છ હુંતિ સોહમ્મે;  
 પલિયાઇ સમયાહિય, ઠિઇ જાસિં જાવ દસ પલિયા.૧૭૦  
 તાઓ સણંકુમારા-ણેવં વડ્ઢન્તિ પલિયદસગેહિં;  
 જા બંભસુક્ક આણય આરણ દેવાણ પન્નાસા. ૧૭૧

ઇસાણે ચઉ લક્ષ્મી, સાહિય પલિયાઈ સમય અહિય ઠિઈ;  
 જા પન્નર પલિય જાસિં તાઓ માહિંદદેવાણં. ૧૭૨  
 એએણ કમેણ ભવે, સમયાહિય પલિયદસગવુડ્ડીએ;  
 લંત સહસ્સાર પાણય, અચ્ચુયદેવાણ પણ પન્ના.૧૭૩  
 કિણહા નીલા કાઊ, તેઉ પમ્હા ય સુક્ક લેસ્સાઓ;  
 ભવણ વણ પઢમ ચઊ લેસ, જોઈસ કપ્પ દુગે તેઊ.૧૭૪  
 કપ્પતિય પમ્હલેસા, લંતાઈસુ સુક્કલેસ હુન્તિ સુરા;  
 કણગાભ પઉમકેસર વન્ના દુસુ તિસુ ઉવરિધવલા.૧૭૫  
 દસવાસસહસ્સાઈ, જહન્ન-માઉ ધરંતિ જે દેવા;  
 તેસિં ચઉત્થાહારો, સત્તહિં થોવેહિં ઊસાસો. ૧૭૬  
 આહિ વાહિ વિમુક્કસ્સ, નીસાસૂસ્સાસ એગગો;  
 પાણુ સત્ત ઇમો થોવો, સોવિ સત્તગુણો લવો. ૧૭૭  
 લવ સત્તહત્તરીએ, હોઈ મુહૂત્તો ઇમંમિ ઊસાસા;  
 સગતીસ સય તિહુત્તર, તીસ ગુણા તે અહોરત્તે.૧૭૮  
 લક્ષ્મં તેરસ સહસા, નઉયસયં અયરસંખયા દેવે;  
 પકખેહિં ઊસાસો વાસસહસ્સેહિં આહારો. ૧૭૯  
 દસવાસસહસ્સુવરિં, સમયાઈ જાવ સાગરં ઊણં;  
 દિવસમુહુત્ત પુહુત્તા, આહારૂસાસ સેસાણં. ૧૮૦  
 સરીરેણ ઓયાહારો, તયાઈ ફાસેણ લોમઆહારો;  
 પકખે વા હારો પુણ, કાવલિઓ હોઈ નાયવ્વો.૧૮૧  
 ઓયાહારા સવ્વે અપજજત્ત પજજત્ત લોમ આહારો;  
 સુરનિરય ઇગિંદિવિણા, સેસા ભવત્થા સપકખેવા.૧૮૨  
 સચિત્તચિત્તોભય, રૂવો આહાર સવ્વતિરિયાણં;  
 સવ્વનરાણં ચ તહા, સુરનેરઈયાણ અચ્ચિત્તો. ૧૮૩  
 આભોગાણાભોગા, સવ્વેસિં હોઈ લોમઆહારો;  
 નિરયાણં અમણુત્તો, પરિણમઈ સુરાણ સમણુત્તો.૧૮૪  
 તહ વિગલ નારયાણં, અંતમુહુત્તા સ હોઈ ઉક્કોસો;  
 પંચિંદિતિરિનરાણં, સાહાવિઓ છટ્ઠ અટ્ઠમઓ.૧૮૫  
 વિગ્ગહગઈમાવન્ના, કેવલિણો સમુહયા અજોગી ય;  
 સિદ્ધા ય અણાહારા, સેસા આહારગા જીવા. ૧૮૬  
 કેસટ્ઠિં મંસ નહ રોમ, રહિર વસ ચમ્મ મુત્ત પુરિસેહિં;  
 રહિયા નિમ્મલદેહા, સુગંધનીસાસ ગયલેવા. ૧૮૭  
 અંતમુહુત્તેણં ચિય, પજજત્તા તરુણપુરિસસંકાસા;  
 સવ્વંગભૂસણધરા, અજરા નિરુયા સમા દેવા. ૧૮૮  
 અણિમિસનયણા મણ-કજ્જસાહણા પુષ્કદામ અમિલાણા;  
 ચઉરંગુલેણ ભૂમિં, ન દિવન્તિ સુરા જિણા ભિંતિ.૧૮૯  
 પંચસુ જિણાકલ્લાણેસુ, ચેવ મહરિસિતવાણુભાવાઓ;  
 જમ્મંતરનેહેણ ય, આગચ્છન્તિ સુરા ઇહયં. ૧૯૦  
 સંકંતદિવ્વપેમા, વિસયપસત્તા સમત્તકત્તવ્વા;  
 અણાહીણમણુયકજ્જા, નરભવમસુહં ન ઇંતિ સુરા.૧૯૧  
 ચત્તારિ પંચ જોયણ સયાઈ ગંધો ય મણુયલોગસ્સ;  
 ઉડ્ડં વચ્ચઈ જેણં, ન હુ દેવા તેણ આવન્તિ. ૧૯૨  
 દોકપ્પ પઢવિં, દો દો દો બીય તઈયગં ચઉત્થિં;

University.org

भवतु

ચઉ ઉવરિમ ઓહીએ, પાસન્તિ પંચમં પુઢવિં. ૧૯૩  
 સટ્ટિં ઇ ગેવિજ્જા, સત્તમીયરે અણુત્તરસુરા ઉ;  
 કિંચૂણલોગનાલિં, અસંખદીવુદ્ધિ તિરિયં તુ. ૧૯૪  
 બહુઅરગં ઉવરિમગા, ઉડ્ડં સવિમાણચૂલિયધયાઈ;  
 ઊણદ્ધસાગરે સંખજોયણા તપ્પરમસંખા. ૧૯૫  
 પણવીસજોયણાલહુ, નારય ભવણ વણ જોઈ કપ્પાણં;  
 ગેવિજ્જણુત્તરાણ ય, જહસંખંઓહિ આગારા. ૧૯૬  
 તપ્પાગારે પલ્લગ, પડહગ જલ્લરિ મુઈંગ પુફ્ફ જવે;  
 તિરિયમણુએસુઓહિ, નાણવિહસંઠિઓ ભણિઓ. ૧૯૭  
 ઉડ્ડં ભવણવણાણં, બહુગો વેમાણિયાણહો ઓહી;  
 નારય જોઈસ તિરિયં, નરતિરિયાણં અણેગવિહો. ૧૯૮  
 ઇય દેવાણં ભણિયં, ઠિઈ પમુહં નારયાણ વુચ્છામિ;  
 ઇગ તિન્નિ સત્ત દસ સત્તર, અયર બાવીસ, તિત્તીસા. ૧૯૯  
 સત્ત ય પુઢવીસુ ઠિઈ, જિટ્ઠોવરિમાઈ હિટ્ઠપુઢવીએ;  
 હોઈ કમેણ કણિટ્ઠા, દસવાસ સહસ્સ પઢમાએ. ૨૦૦  
 નવઈ સમ સહસ લકખા, પુવ્વાણં કોડી અયર દસ ભાગા;  
 ઇક્કિલ્લભાગ વુડ્ડિ, જા અયરં તેરસે પયરે. ૨૦૧  
 ઇય જિટ્ઠજહન્ના પુણ, દસ વાસ સહસ્સ લકખ પયરદુગે;  
 સેસેસુ ઉવરિ જિટ્ઠા, અહો કણિટ્ઠાઉ પઈ પુઢવી. ૨૦૨  
 ઉવરિખિઈ ઠિઈવિસેસો, સગપયર વિહત્તુ ઇચ્છ સંગુણિઓ;  
 ઉવરિખિઈ ઠિઈ સહિઓ, ઇચ્છિયપયરંમિ ઉક્કોસા. ૨૦૩  
 બંધણ ગઈ સંઠાણા, ભેયા વન્ના ય ગંધ રસ ફાસા;  
 અગુરુ લહુ સદ્દ દસહા, અસુહા વિય પુગ્ગલા નિરએ. ૨૦૪  
 નરયા દસવિહવેયણ, સી ઉસિણ ખુહ પિવાસ કંડૂહિં;  
 પરવસ્સં જર દાહં, ભય સોગં ચેવ વેયંતિ. ૨૦૫  
 સત્તસુ ખિત્તજવિયણા, અણ્ણુણ કયાવિ પહરણોહિ વિણા;  
 પહરણકયા વિ પંચસુ, તિસુ પરમાહમ્મિય કયાવિ. ૨૦૬  
 રયણાપ્પહ સક્કરપહ વાલુયપહ પંકપહ ય ધૂમપહા;  
 તમપહા તમતમપહા, કમેણ પુઢવીણ ગોત્તાઈ. ૨૦૭  
 ઘમ્મા વંસા સેલા, અંજણ રિટ્ઠા મઘા ય માઘવઈ;  
 નામેહિં પુઢવીઓ, ઇત્તાઈઇત્તસંઠાણા. ૨૦૮  
 અસીય બત્તીસ અડવીસ, વીસા અટ્ઠાર સોલ અડસહસા;  
 લકખુવરિ પુઢવિપિંડો, ઘણુદ્ધિ ઘણવાય તણુવાયા. ૨૦૯  
 ગયણં ય પઈટ્ઠાણં, વીસસહસ્સાઈ ઘણુદ્ધીપિંડો;  
 ઘણાતણુ વાયાગાસા, અસંખજોયણ જુયા પિંડો. ૨૧૦  
 ન કુસંતિ અલોગં, ચઉદ્ધિસંપિ પુઢવી ય વલયસંગહિયા;  
 રયણાએ વલયાણં, ઇ દ્વપંચમ જોયણં સડ્ડં. ૨૧૧  
 વિકખંભોઘણાઉદ્ધી ઘણાતણુવાયાણ હોઈ જહસંખં;  
 સતિભાગ ગાઉયં, ગાઉયં ય તહ ગાઉયતિભાગો. ૨૧૨  
 પઢમમહીવલએસું, ખિવિજ્જ એયં કમેણ બીયાએ;  
 દુ તિ ચઉ પંચ ઇ ગુણં, તઈયાઈસુ તંપિ ખિવ કમસો. ૨૧૩  
 મજ્જે ચિય પુઢવી અહે, ઘણુદ્ધિપમુહાણ પિંડપરિમાણં;  
 ભણિયં તઓ કમેણં, હાયઈ જા વલયપરિમાણં. ૨૧૪

૧૯૯

૨૦૪

૨૧૩

તીસ પણવીસ પત્રરસ, દસતિન્નિ પશૂણ એગલકખાઈં;  
 પંચ ય નરયા કમસો, ચુલસી લકખાઈં સત્તસુ વિ.૨૧૫  
 તેરિક્કારસ નવ સગ, પણ તિન્નિગ પયર સવ્વિગુણવન્ના;  
 સીમંતાઈ અપ્પઈઠાણંતા ઈંદયા મજ્જે. ૨૧૬  
 તેહિંતો દ્દિસિ વિદ્દિસિ, વિણિગ્ગયા અટ્ઠ નિરયઆવલીઆ;  
 પઢમે પયરે દ્દિસિ ગુણ-વન્ન વિદ્દિસાસુ અડયાલા.૨૧૭  
 બીયાઈસુ પયરેસુ, ઈગ ઈગ હીણા ઉ હુન્તિ પંતીઓ;  
 જાસત્તમીમહીપયરે, દ્દિસિ ઈક્કિક્કો વિદ્દિસિ નત્થિ.૨૧૮  
 ઈટ્ઠપયરેગ દ્દિસિ-સંખઅડગુણા ચઉવિણા સઈગસંખા;  
 જહ સીમંતયપયરે, એગુણનઉયા સયાતિન્નિ. ૨૧૯  
 અપયટ્ઠાણો પંચ ઉ, પઢમો મુહમંતિમો હવઈ ભૂમી;  
 મુહભૂમી સમાસદ્ધં, પયરગુણં હોઈ સવ્વઘણં. ૨૨૦  
 ઇન્નવઈસય તિવન્ના, સત્તસુ પુઢવીસુ આવલી નિરયા;  
 સેસ તિયાસી લકખા, તિસય સિયાલા નવઈ સહસા.૨૨૧  
 તિસહસ્સુરયા સવ્વે, સંખમસંખિજ્જ વિત્થડાયામા;  
 પણયાલલકખ સીમંતઓ ય લકખં અપઈટ્ઠાણો.૨૨૨  
 ઇસુ હિટ્ઠોવરિ જોયણસહસ્સ બાવન્ન સડ્ઢચરિમાએ;  
 પુઢવીએ નરયરહિયં, નરયા સેસંમિ સવ્વાસુ. ૨૨૩  
 બિસહસ્સૂણા પુઢવી, તિસહસ્સગુણોહિં નિયપયરેહિં;  
 ઊણા રુવૂણ નિય પયરભાઈયા પત્થંતરયં. ૨૨૪  
 પઉણટ્ઠ ઘણુ ઇ અંગુલ, રયણાએ દેહમાણમુક્કોસં;  
 સેસાસુ દુગુણ દુગુણં, પણ ઘણુ સય જાવચરમાએ.૨૨૫  
 રયણાએ પઢમપયરે, હત્થતિયદેહમાણ મણુપયરં;  
 ઇપ્પન્નંગુલસડ્ઢા, વુડ્ઢી જા તેરસે પુન્નં. ૨૨૬  
 જં દેહપમાણં ઉવરિમાએ, પુઢવીઈ અંતિમે પયરે;  
 તં ચિય હિટ્ઠિમપુઢવીપઢમપયરંમિ બોદ્ધવ્વં. ૨૨૭  
 તં ચેગુણગ સગપયર-ભઈયં બીયાઈપયરવુડ્ઢિભવે;  
 તિકર તિઅંગુલ કરસત્ત, અંગુલા સડ્ઢિગુણવીસં.૨૨૮  
 પણઘણુ અંગુલવીસં, પનરસઘણુ દુન્નિ હત્થ સડ્ઢા ય;  
 બાસટ્ઠિ ઘણુહ સડ્ઢા, પણ પુઢવી પયર વુડ્ઢિ ઈમા.  
 ઈઅ સાહાવિય દેહો, ઉત્તરવેઉવ્વિઓ ય તદુગુણો;  
 દુવિહો વિ જહન્ન કમા, અંગુલ અસંખ સંખંસો.૨૩૦  
 સત્તસુ ચઉવીસ મુહૂ, સગ પત્રર દ્દિશેગ દુ ચઉ ઇમ્માસા;  
 ઉવવાયચવણવિરહો, ઓહે બારસ મુહૂત્ત ગુરુ.૨૩૧  
 લહુઓ દુહાવિ સમઓ, સંખા પુણ સુરસમા મુણેયવ્વા;  
 સંખાઉ પજ્જત્ત પિણિદ્દિ-તિરિનરા જંતિ નરએસુ.૨૩૨  
 મિચ્છદ્દિટ્ઠ મહારંભ, પરિગ્ગહો તિવ્વકોહ નિસ્સીલો;  
 નરયાઉઅં નિબંધઈ, પાવમઈ રુદ્ધપરિણામો. ૨૩૩  
 અસન્નિ સરિસિવ પકખી, સીહ ઉરગિત્થિ જન્તિ જો ઇટ્ઠિં;  
 કમસો ઉક્કોસેણં, સત્તમવુઢવિં મણુય મચ્છા. ૨૩૪  
 વાલા દાઢી પકખી, જલચર નરયાગયા ઉ અઈકૂરા;  
 જંતિ પુણો નરએસુ, બાહુલ્લેણં ન ઉણા નિયમો.૨૩૫  
 દો પઢમ પુઢવિગમણં, ઇવટ્ઠે કીલિયાઈ સંઘયણે;

ઇક્કિક્ક પુઠવિવુડ્ઠી, આઠતિલેસ્સા ઉ નરએસું. ૨૩૬  
 દુસુ કાઊ તઇયાએ, કાઊ નીલાય નીલ પંકાએ;  
 ધૂમાએ નીલકિણ્ણા, દુસુકિણ્ણા હુન્તિ લેસ્સાઓ. ૨૩૭  
 સુરનારયાણ તાઓ, દવ્વલેસા અવટ્ઠિઠઆ ભણિયા;  
 ભાવપરાવત્તીએ, પુણ એસિં હુન્તિ છલ્લેસા. ૨૩૮  
 નિરઉવ્વટ્ઠા ગબ્ભય, પજ્જત્ત સંખાઉ લલ્લિ એએસિં;  
 ચક્કિ હરિજુઅલ અરિહા, જિણ્ણાઠદ્ધિસિ સમ્મ પુહવિક્કમા. ૨૩૯  
 રયણાએ ઓહિ ગાઉઅ, ચત્તારિ અદ્ધુટ્ઠ ગુરુ લહુ કમેણા;  
 પઇ પુઠવિ ગાઉયદ્ધં, હાયઇ જા સત્તમિ ઇગદ્ધં. ૨૪૦  
 ગબ્ભનર તિપલિયાઊ, તિગાઉ ઉક્કોસ તે જહન્નેણં;  
 મુચ્છિમ દુહાવિઅંતમુહૂ, અંગુલઅસંખભાગતણૂ. ૨૪૧  
 બારસમુહુત્ત ગબ્ભે, ઇયરે ચઉવીસ વિરહ ઉક્કોસો;  
 જમ્મમરણેસુ સમઓ, જહન્નસંખા સુરસમાણા. ૨૪૨  
 સત્તમ મહિ નેરઇએ, તેઊ વાઊ અસંખ નર તિરિએ;  
 મુત્તૂણા સેસ જીવા, ઉપ્પજ્જંતિ નરભવંમિ. ૨૪૩  
 સુર નેરઇએહિં ચિય, હવંતિ હરિ અરિહ ચક્કિ બલદેવા;  
 ચઊવિહસુર ચક્કિબલા, વેમાણિય હુન્તિ હરિ અરિહા. ૨૪૪  
 હરિણો મણુસ્સ રયણાઇં, હુન્તિ નાણુત્તરેહિં દેવેહિં;  
 જહ સંભવમુવવાઓ, હયગયએગિંદિરયણાણં. ૨૪૫  
 વામપમાણં ચક્કં, ઇત્તં દંડં દુહલ્લયં ચમ્મં;  
 બત્તીસંગુલખગ્ગો, સુવન્નકાગિણિ ચઉરંગુલિયા. ૨૪૬  
 ચઉરંગુલો દુઅંગુલ પિહુલોય મણિ પુરોહિ ગય તુરયા;  
 સોણાવઇ ગાહાવઇ, વડ્ઢ ઇત્થી ચક્કિરયણાઇં. ૨૪૭  
 ચક્કં ઘણુદં ખગ્ગો, મણી ગયા તહ ય હોઇ વણમાલા;  
 સંખ સત્ત ઇમાઇં, રયણાઇં વાસુદેવસ્સ. ૨૪૮  
 સંખ નરા ચઉસુ ગઇસુ, જંતિ પંચસુવિ પઠમસંઘયણે;  
 ઇગ દુ તિ જા અટ્ઠસયં, ઇગસમએ જંતિ તે સિદ્ધિં. ૨૪૯  
 વીસિત્થિ દસ નપુંસગ, પુરિસટ્ઠસયં તુ એગસમએણં;  
 સિજ્જઇ ગિહિ અન્ન સલિંગ, ચઉ દસ અટ્ઠાહિય સયંચ. ૨૫૦  
 ગુરુલહુ મજ્જિમ દો ચઉ, અટ્ઠસયં ઉડ્ઢહો તિરિયલોએ;  
 ચઉબાવીસટ્ઠસયં, દુ સમુદ્દે તિન્નિ સેસજલે. ૨૫૧  
 નરચતિરિયાગયા દસ, નરદેવ ગઇઉ વીસ અટ્ઠસયં;  
 દસ રયણા સક્કર વાલુયાઉ, ચઉ પંક ભૂદ્દગઓ. ૨૫૨  
 ઇચ્ચ વણસ્સઇ દસ તિરિ, તિરિત્થી દસ મણુય વીસ નારીઓ;  
 અસુરાઇવંતરા દસ, પણ તદેવિઉ પત્તેયં. ૨૫૩  
 જોઇ દસ દેવિ વીસં, વેમાણિયટ્ઠસય વીસ દેવીઓ;  
 તહ પુંવેએહિંતો, પુરિસો હોઊણ અટ્ઠસયં. ૨૫૪  
 સેસટ્ઠ ભંગએસુ, દસ દસ સિજ્જન્તિ એગસમએણં;  
 વિરહો ઇમાસ ગુરુઓ, લહુ સમઓ ચવણમિહ નત્થિ. ૨૫૫  
 અડ સગ ઇ પંચ ચઉ તિન્નિ, ઇક્કો ય સિજ્જમાણેસુ;  
 બત્તીસાઇસુ સમયા, નિરંતરં અંતરં ઉવરિં. ૨૫૬  
 બત્તીસા અડયાલા, સટ્ઠી બાવત્તરી ય બોધવ્વા;  
 ચુલસીઇ ઇન્નવઇ, દુરહિય-મટ્ઠુત્તર સયં ચ. ૨૫૭

પશયાલલકખજોયણ, વિકખંભા સિદ્ધ સિલ ફલિહવિમલા;  
 તદ્વરિગ જોયણંતે, લોગંતો તત્થ સિદ્ધઠિઈ. ૨૫૮  
 બાવીસ સગ તિ દસવાસ-સહસ ગણિતિદિણ બેઈંદિયાઇસુ;  
 બારસ વાસુણપણ દિણ, છમ્માસતિપલિયઠિઈ જિટ્ઠા. ૨૫૯  
 સણહા ય સુદ્ધ વાલુય, મણોસિલા સક્કરાય ખર પુઢવી;  
 ઇગ બાર ચઉદ્ધ સોલસ, ટ્ઠારસ બાવીસ સમસહસા. ૨૬૦  
 ગબ્ભ ભુય જલયરોભય, ગબ્ભોરગ પુવ્વ કોડિ ઉક્કોસા;  
 ગબ્ભચઉપ્પય-પક્ખિસુ, તિપલિય પલિયાઅસંખંસો. ૨૬૧  
 પુવ્વસ્સ ઉ પરિમાણં, સયરિં ખલુ વાસ કોડિલકખાઓ;  
 છપ્પત્તં ચ સહસ્સા, બોધવ્વા વાસકોડીણં. ૨૬૨  
 સમુચ્છિમપણિંદિ થલખયર, ઉરગ ભુયગ જિટ્ઠઠિઈ કમસો;  
 વાસ સહસ્સા ચુલસી, બિસત્તરિ તિપત્ત બાયાલા. ૨૬૩  
 એસા પુઢવાઈણં, ભવઠિઈ કાયઠિઈ;  
 સંપયં તુ ચઉ એગિંદિસુ ણોયા, ઉસ્સપ્પિણિઓ અસંખિજ્જા. ૨૬૪  
 તાઓ વણંમિ અણંતા, સંખિજ્જા વાસસહસ વિગલેસુ;  
 પંચિંદિતિરિનરેસુ, સત્તટ્ઠભવા ઉ ઉક્કોસા. ૨૬૫  
 સવ્વેસિંપિ જહન્ના, અંતમુહુત્તં ભવે ય કાયે ય;  
 જોયણસહસ્સમહિયં, એગિંદિય દેહ મુક્કોસં. ૨૬૬  
 બિતિયઉરિંદિ સરીરં, બારસ જોયણ તિકોસ ચઉકોસં;  
 જોયણસહસ પણિંદિય, ઓહે વોચ્છં વિસેસં તુ. ૨૬૭  
 અંગુલઅસંખભાગો, સુહુમનિગોઓ અસંખ ગુણવાગિ;  
 તો અગણિ તઓ આઉ, તત્તો સુહુમા ભવે પુઢવી. ૨૬૮  
 તો બાયર વાઉ ગણી, આગિ પુઢવી નિગોય અણુક્કમસો;  
 પત્તેઅવણસરીરં, અહિયં જોયણસહસ્સં તુ. ૨૬૯  
 ઉસ્સેહંગુલજોયણં, સહસ્સમાણે જલાસએ નેયં;  
 તં વલ્લિપઉમપમુહું, અઓ પરં પુઢવીરૂવં તુ. ૨૭૦  
 બારસજોયણ સંખો, તિકોસ ગુમ્મીય જોયણં ભમરો;  
 મુચ્છિમ ચગિપય ભુય, ગુરગગાગિ ઘણુજોયણપુહુત્તં. ૨૭૧  
 ગબ્ભ ચઉપ્પય છગ્ગાઉયાઇ, ભુયગાઉ ગાઉયપુહુત્તં;  
 જોયણસહસ્સમુરગા, મચ્છા ઊભયે વિ ય સહસ્સં. ૨૭૨  
 પક્ખિદુગ ઘણુપ્પુહુત્તં, સવ્વાણંગુલ અસંખ ભાગલહૂ;  
 વિરહો વિગલાસત્તીણ, જમ્મમરણેસુ અંતમુહૂ. ૨૭૩  
 ગબ્ભે મુહુત્ત બારસ, ગુરુઓ લહુ સમય સંખ સુરતુલ્લા;  
 અણુ સમયમસંખિજ્જા, એગિંદિય હુંતિ ય ચવંતિ. ૨૭૪  
 વણકાઇઓ અણંતા, ઇક્કોક્કાઓ વિ જં નિગોયાઓ;  
 નિચ્ચમસંખો ભાગો, અણંતજીવો ચયઇ એઇ. ૨૭૫  
 ગોલા ય અસંખિજ્જા, અસંખનિગોયઓ હવઇ ગોલા;  
 ઇક્કિક્કમિ નિગોએ, અણંતજીવા મુણેયવ્વા. ૨૭૬  
 અચ્ચિ અણંતા જીવા, જેહિં ન પત્તો તસાઇ પરિણામો;  
 ઉપ્પજ્જંતિ ચયંતિ ય, પુણોવિ તત્થેવ તત્થેવ. ૨૭૭  
 સવ્વોવિ કિસલઓ ખલુ, ઉગ્ગમમાણો અણંતઓ ભણિઓ;  
 સો ચેવ વિવડ્ઢંતો, હોઇ પરિત્તો અણંતો વા. ૨૭૮  
 જયા મોહોદઓ તિવ્વો, અન્નાણં ખુ મહબ્ભયં;

૨૫૯

૨૬૦

૨૬૪

ભવતુ

પેલવં વેયણીયં તુ, તયા એગિંદિયત્તણં. ૨૭૯  
 તિરિએસુ જંતિ સંખાઉ, તિરિ નરા જાદુકપ્પદેવાઓ;  
 પજજત્તસંખગબ્ભય, બાયર ભૂદગપરિત્તેસુ. ૨૮૦  
 તો સહસારંત સુરા, નિરયા પજજત્તસંખગબ્ભેસુ;  
 સંખપણિંદિયતિરિયા, મરિઉંચઉસુવિ ગઇસુ જન્તિ. ૨૮૧  
 થાવર વિગલા નિયમા, સંખાઉય તિરિનરેસુ ગચ્છન્તિ;  
 વિગલાલબ્ભિજજ વિરઇં, સમ્મંપિ ન તેઉવાઉ ચુયા. ૨૮૨  
 પુઢવી દગ પરિત્તવણા, બાયર પજજત્ત હુન્તિ ચઉલેસા;  
 ગબ્ભયતિરિયનરાણં, છલ્લેસા તિન્નિ સેસાણં. ૨૮૩  
 અંતમુહુત્તંમિ ગએ, અંતમુહુત્તંમિ સેસએ ચેવ;  
 લેસાહિ પરિણયાહિં, જીવા વચ્ચંતિ પરલોયં. ૨૮૪  
 તિરિનર આગામિભવ લેસ્સાએ અઇગયે સુરા નિરયા;  
 પુવ્વભવ લેસ્સસેસે, અંતમુહુત્તે મરણમિતિ. ૨૮૫  
 અંતમુહુત્ત ઠિઇઓ, તિરિયનરાણં હવન્તિ લેસ્સાઓ;  
 ચરિમા નરાણ પુણ નવવાસૂણા પુવ્વકોડી વિ. ૨૮૬  
 તિરિયાણ વિ ઠિઇપમુહં, ભણિયમસેસંપિ સંપઇ વુચ્છં;  
 અભિહિયદ્દારબ્ભહિયં, ચઉગઇ જીવાણ સામન્નં. ૨૮૭  
 દેવા અસંખનરતિરિ, ઇત્થી પુંવેય ગબ્ભનરતિરિયા;  
 સંખાઉયા તિવેયા, નપુંસગા નારયાઇઆ. ૨૮૮  
 આયંગુલેણ વત્થું, સરીરમુસ્સેહઅંગુલેણ તહા;  
 નગપુઢવિ-વિમાણાઇં, મિણસુ પમાણંગુલેણં તુ. ૨૮૯  
 સત્થેણ સુતિકખેણ વિ, ઇત્તું ભિત્તું ચ જં કિર ન સક્કા;  
 તં પરમાણું સિદ્ધા, વયંતિ આઇં પમાણાણં. ૨૯૦  
 પરમાણૂ તસરેણૂ રહરેણૂ, વાલઅગ્ગ લિકખા ય;  
 જૂય જવો અટ્ટગુણો, કમેણ ઉસ્સેહ અંગુલયં. ૨૯૧  
 અંગુલ છક્કં પાઓ, સો દુગુણ વિહત્થિ સા દુગુણ હત્થો;  
 ચઉહત્થં ઘણુ દુસહસ, કોસો તે જોયણં ચઉરો. ૨૯૨  
 ચઉસયગુણં પમાણં-ગુલમુસ્સેહંગુલાઉ બોધવ્વં;  
 ઉસ્સેહંગુલ દુગુણં, વીરસ્સાયંગુલં ભણિયં. ૨૯૩  
 પુઢવાઇંસુ પત્તેયં, સગ વણ પત્તેય ણંત દસ ચઉદ્દ;  
 વિગલે દુ દુ સુરનારય, તિરિ ચઉ ચઉ ચઉદ્દસ નરેસુ. ૨૯૪  
 એગિંદિએસુ પંચસુ, બાર સગ તિ સત્ત અટ્ટાવીસા ય;  
 વિગલેસુ સત્ત અડ નવ, જલ ખહ ચઉપય ઉરગ ભુયગે. ૨૯૫  
 અદ્ધ તેરસ બારસ, દસ દસ નવગં નરામરે, નિરએ;  
 બારસ છવ્વીસ પણવીસ, હુન્તિ કુલ કોડિ લક્ખાઇં. ૨૯૬  
 ઇગ કોડિ સત્ત નવઇ, લક્ખા સડ્ઢા કુલાણ કોડીણં;  
 સંવુડજોણિ સુરેગિદિ, નારયા વિયડ વિગલ ગબ્ભુભયા. ૨૯૭  
 અચિત્તજોણિ સુર નિરય, મીસ ગબ્ભે તિભેય સેસાણં;  
 સી ઉસિણ નિરય સુરગબ્ભ, મીસ તે ઉસિણ સેસ તિહા. ૨૯૮  
 હયગબ્ભ સંખવત્તા, જોણી કુમુન્નયાઇ જાયંતિ;  
 અરિહ હરિ ચક્કિરામા, વંસીપત્તાઇ સેસ નરા. ૨૯૯  
 આઉસ્સ બંધકાલો, અબાહકાલો ય અંતસમઓ ય;  
 અપવત્તણ-ણપવત્તણ, ઉવક્કમ-ણુવક્કમા ભણિયા. ૩૦૦

બંધન્તિ દેવ નારય, અસંખ નર તિરિ છમાસ સેસાઊ;  
 પરભવિયાઊ સેસા, નિરુવક્કમ તિભાગ સેસાઊ.૩૦૧  
 સોવક્કમાઊયા પુણ, સેસ તિભાગે અહવ નવમભાગે;  
 સત્તાવીસઠમે વા, અંતમુહુત્તંતિમે વા વિ. ૩૦૨  
 જઇમે ભાગે બંધો, આઉસ્સ ભવે અબાહકાલો સો;  
 અંતે ઉજ્જુગઇ ઇગ-સમય વક્ક ચઉ પંચસમયં તા.૩૦૩  
 ઉજ્જુગઇ પઢમસમએ, પરભવિયં આઉયં તહાહારો;  
 વક્કાઇ બીય સમએ, પરભવિયાઉ ઉદયમેઇ. ૩૦૪  
 ઇગ દુ તિ ચઉ વક્કાસુ, દુગાઇસમએસુ પરભવાહારો;  
 દુગવક્કાઇસુ સમયા, ઇગ દો તિન્નિય અણાહારા.૩૦૫  
 બહુકાલ વેયણિજજં, કમ્મં અપ્પેણ જમિહ કાલેણં;  
 વેઇજજઇ જુગવં ચિય, ઉઇન્ન સવ્વપએ સગ્ગં. ૩૦૬  
 અપવત્તણિજજમેયં, આઉ અહવા અસેસકમ્મંપિ;  
 બંધસમયે વિ બદ્ધં, સિદ્ધિલં ચિય તં જહા જોગં.૩૦૭  
 જં પુણ ગાઢનિકાયણ, બંધેણં પુવ્વમેવ કિલ બદ્ધં;  
 તં હોઇ અણપવત્તણ, જુગ્ગં કમ વેયણિજજઇલં.૩૦૮  
 ઉત્તમ ચરમસરીરા, સુરનેરઇયા અસંખનરતિરિયા;  
 હુન્તિ નિરુવક્કમાઓ, દુહાવિ સેસા મુણેયવ્વા.૩૦૯  
 જેણાઉમુવક્કમિજજઇ, અપ્પસમુત્થેણ ઇયરગેણાવિ;  
 સો અજ્જવસાણાઇ, ઉવક્કમ-ણુવક્કમો ઇયરો.૩૧૦  
 અજ્જવસાણ નિમિત્તે, આહારે વેયણા પરાઘાએ;  
 ફાસે આણાપાણૂ સત્તવિહં ઝિજજએ આઉ. ૩૧૧  
 આહારસરીરઇંદિય, પજજત્તી આણપાણ ભાસ મણે;  
 ચઉ પંચ પંચ ઇપ્પિય, ઇગ વિગલા સન્નિ સન્નીણં.૩૧૨  
 આહાર સરીર ઇંદિય, ઊસાસ વઊ મણો-ભિનિવ્વત્તી;  
 હોઇ જઓ દલિયાઊ, કરાણં પઇ સાઉ પજજત્તી.૩૧૩  
 પણિંદિય તિબલૂસા-સાઊ દસપાણ ચઉ ઇ સગ અટ્ઠ;  
 ઇગદુતિ ચઊરિંદિણં, અસન્નિસન્નીણ નવ દસય.૩૧૪  
 સંખિત્તા સંઘયણી, ગુરુત્તર સંઘયણિમજ્જઓ એસા;  
 સિરિસિરિચંદમુણિંદેણ, નિમ્મિયા અપ્પપઢણટ્ઠા.૩૧૫  
 સંખિત્તયરી ઉ ઇમા, સરીરમોગાહણા ય સંઘયણા;  
 સન્ના સંઠાણ કસાય, લેસિંદિય દુ સમુઘયા. ૩૧૬  
 દિટ્ઠી દંસણ નાણે, જોગુવઓગોવવાય ચવણ ઠિઇ;  
 પજજત્તિ કિમાહારે, સન્નિ ગઈ આગઈ વેએ. ૩૧૭  
 મલહારિહેમસૂરીણ, સીસલેસેણ વિરઇયં સમ્મં;  
 સંઘયણિરયણમેયં, નંદઉ જા વીરજિણાતિત્થં. ૩૧૮

### બૃહત્સંગ્રહણીમાં ઉપયોગી ગાથાઓ

પંચસયા બાવીસા, તિન્નેવસયા ઉ હુંતિ છપ્પન્ના;  
 તિન્નિસયા અડયાલા, સણંકુમારસ્સ વટ્ઠાઈ. ૧  
 સત્તરિસયમણૂણં, તિન્નેવસયા હવન્તિ છપ્પન્ના;  
 તિન્નિસયા અડયાલા, વટ્ઠાઇ માહિંદસગ્ગસ્સ. ૨  
 ચોવત્તરિ ચુલસીયા, છસુત્તરયા દુવે દુવે સયાઓ;  
 કપ્પંમિ બંભલોએ, વટ્ઠા તંસા ય ચઉરંસા. ૩

તિનઉય એવ સયં, દો એવ સયા સયં ચ બાણઉયં;  
 કપ્પંમિ લંતગંમિ, વટ્ટા તંસા ય ચઉરંસા. ૪  
 અઠ્ઠાવીસં ચ સયં છત્તીસસયં સયં ચ બત્તીસં;  
 કપ્પંમિ મહાસુક્કે, વટ્ટા તંસા ય ચઉરંસા. ૫  
 અટ્ટહુત્તરસય સોલસ-સય પુણ અટ્ટહુત્તરં સયં પુણ્ણં;  
 કપ્પંમિ સહસ્સારે, વટ્ટા તંસા ય ચઉરંસા. ૬  
 અડસીઈ બાણઉઈ, અટ્ટઠાસીઈ ય હોઈ બોધવ્વા;  
 આણયપાણયકપ્પે, વટ્ટા તંસા ય ચઉરંસા. ૭  
 ચઉસટ્ટઠી બાવત્તરિ, અડસટ્ટઠી એવ હોઈ નાયવ્વા;  
 આરણઅચ્ચુયકપ્પે, વટ્ટા તંસા ય ચઉરંસા. ૮  
 પણતીસા ચત્તાલા, છત્તીસા હેટ્ઠિંમંમિ ગેવિજ્જે;  
 તેવીસા અટ્ટઠાવીસા, ચોવીસા એવ મજ્જિમએ. ૯  
 ઇક્કારસ સોલસ, બારસેવ ગેવિજ્જે ઉવરિમે હુંતિ;  
 એક્કં વટ્ટા તંસા, ચઉરો ય અણુત્તરવિમાણો. ૧૦  
 અચ્ચિ તહાચ્ચિમાલી, વઇરોયણ પભંકર ય ચંદાભં;  
 સુરાભં સુક્કાભં, સુપઇટ્ટઠાભં ય રિટ્ટઠાભં. ૧૧  
 સારસ્સયમાઈચ્ચા, વણહી વરૂણા ય ગદતોયા ય;  
 તુસિયા અવ્વાબાહા, અગ્ગિ તહ એવ રિટ્ટઠા ય. ૧૨  
 નાણસ્સ કેવલીણં, ધમ્માયરિયસ્સ સવ્વસાહૂણં;  
 માઈ અવણણવાઈ, કિબ્બિસિયભાવણં કુણઇ. ૧૩  
 કોઊય ભૂઇકમ્મે, પસિણાપસિણો નિમિત્તમાજ્જવે;  
 ઇરૂદ્ધરસસાયગરૂઓ, અભિઓગં ભાવણં કુણઇ. ૧૪  
 તેસીયા પંચસયા, ઇક્કારસ એવ જોયણ સહસ્સા;  
 રયણાએ પત્થડંતર, મેગો ચિય જોયણ તિભાગો. ૧૫  
 સત્તાણવઇ સયાઇ, બીયાએ પત્થડંતરં હોઈ;  
 પણહત્તરિ તિન્નિ સયા, બારસ સહસ્સ તઈયાએ. ૧૬  
 છાવટ્ટિં સયં સોલસ-સહસ્સ એગો ય દો વિભાગાઈ;  
 અડ્ઠાઇજ્જ સયાઇ, પણવીસસહસ્સ ધૂમાએ. ૧૭  
 બાવન્નસહસ્સાઇ, પંચેવ હવંતિ જોયણ સયાઇ;  
 પત્થડંતરમેયં, છટ્ટઠી પુઢવીએ નાયવ્વં. ૧૮  
 સીમંતઓ ત્થ પઢમો, બીઓ પુણ રોરૂયત્તિ નામેણ;  
 રંભો (ભંતો) ય ત્થ તઇઓ, હોઇ ચઉત્થો ય ઉબ્ભંતો. ૧૯  
 સંભંતમસંભંતો, વિબ્ભંતો એવ સત્તમો નિરઓ;  
 અટ્ટમઓ ભંતો (તત્તો) પુણ, નવમો સીઓત્તિ નાયવ્વો. ૨૦  
 વક્કંતમ વક્કંતો, વિકલો (વિક્કંતો) તહ એવ રોરૂઓ નિરઓ;  
 પઢમાએ પુઢવીએ, ઇંદયાએએ બોધવ્વા. ૨૧  
 થણિએ થણાએ ય તસા, મણાએ ય (વ) ણાએ ય હોઇ નાયવ્વો;  
 ઘટ્ટે તહ સંઘટ્ટે, જિબ્ભે અવજિબ્ભએ એવ. ૨૨  
 લોલે લોલાવત્તે, તહેવ ઘણલોલુએ ય બોધવ્વે;  
 બીયાએ પુઢવીએ, ઇક્કારસ ઇંદયા એએ. ૨૩  
 તત્તો તવિઓ તવણો, તાવણો પંચમો ય નિદ્દહો (નિદ્દાહો);  
 છટ્ટો પુણ પજ્જલિઓ ઉપ્પજ્જલિઓ ય સત્તમઓ. ૨૪  
 સજલિઓ અટ્ટમઓ, સંપજ્જલિઓ ય નવમઓ ભણિઓ;

તઇયાએ પુઢવીએ, નવ ઇંદય નારયા એએ. ૨૫  
આરે તારે મારે, વચ્ચે તમએ ય હોઇ નાયવ્વે;  
ખાડખડે ખડખડે, ઇંદય નરયા ય ચઉત્થીએ. ૨૬  
ખાએ તમએ ય તહા, ઊસે ઊ અંધએ ય તહા તિમિસે;  
ઇય પંચમી પુઢવીએ, નિરય ઇંદયા હુંતિ. ૨૭  
હિમ વદલ લલ્લકે, તિન્નિ નિરય ઇંદયા ય છટ્ટીએ;  
એગો ય સત્તમાએ, અપઇટ્ટઠાણો ઊ નામેણાં. ૨૮

[jainuniversity.org](http://jainuniversity.org)



સર્વ જ્ઞાનાય ભવતુ